



鈴山堂集卷第三十七目錄

神道碑

明故兵部尚書兼都察院右副都御史

太保謚襄毅潘公神道碑



明故資政大夫都察院左都御史贈太子少保

吏部尚書謚莊靖宋公神道碑

明故吏部右侍郎王公神道碑

明故通議大夫兵部左侍郎陶公神道碑

明故嘉議大夫南京都察院右副都御史趙公

神道碑

金山堂集卷第三十七

神道碑

明故兵部尚書兼都察院右副都御史贈太子
太保謚襄毅潘公神道碑

嘉靖辛丑夏 詔重建 太廟遴選採木大臣僉議
工部侍郎潘公前建 七陵及 奉先殿實董採木
之役績有成效宜無踰潘公者而公謁告居里於是
得 旨起公于家公受命遄發沿襄漢涉風濤衝冒
霧露以往來川貴之間深林穹谷鳥道巘巖崎嶇之
境躬自援歷不以勤辭公計慮精審區畫有條徵發

金山堂集 卷三十一
不滯以故人樂於從事不二年獲尋丈大木三百有
奇餘木皆稱 廟成賜白金綵幣進工部尚書回籍
需用未幾起公爲兵部尚書兼右副都御史提督兩
廣軍務公前在蜀過勞得疾至是疾益加行次饒州
乃連疏乞休歸而以嘉靖甲辰九月十一日卒于正
寢訃聞 上深憫悼命有司諭祭營葬特贈官保一
品謚襄毅蓋異數云公諱鑑字希古徽之婺源人初
家食與從父今少司馬珍兄少司馬旦弟僉憲選更
相切磨薦志績學年十四代父兄執門戶後上書縣
令令試其文奇之旣領應天鄉薦登正德戊辰進士

授南京大理評事歷寺副正福建按察僉事丁內艱
復除四川改浙江僉事陞貴州按察副使丁外艱復
除河南信陽兵備陞四川按察使改山西陞江西右
布政使四川左使都察院右副都御史巡撫四川遂
改工部右侍郎督木以至今官公初在閩有寇蘇秉
規糾亡命稱大噍哪據海島爲患公分巡其地討平
之南安盜起攻仙遊城將官受檄逗遛不進乃自擐
甲檄興泉民兵伏其歸路邀擊斬獲殆盡福州戊卒
作亂勢猖獗公設方畧擒捕會邵武卒亦叛則單車
馳往諭之而叛者始定於是公名藉起撫蜀以諸縣

金山堂集 卷三十一
衛賦輕重無等吏緣爲奸爲畫一法著之令甲賦賴
以平鹽井麗江兩酋相仇殺公約雲南撫臣持檄諭
之即解請內轄關南寇馬興率衆逼蜀境蠻落十五
寨咸負山谷相結爲援公以計緩之密授總兵等方
畧以兵塞諸要遂帥精騎擣平其巢事聞賜白金彩
幣公在蜀久知地里險易察於民俗之宜周知夷情
之變凡撫循安輯通商便民及詰兵控夷之政大者
驛聞小者案舉其治蜀論者謂有張乖崖之風焉督
木事完奏言湖廣川貴諸府其民疲於採辦困憊不
得息請量議蠲復朝廷從之兩廣之起 上意簡在

特重用之而公弗祿矣公儀觀修挺性夷易不爲危
言激論而耿介壁立不可干以私治官如家恭勤潔
白之操始終一致焉生成化壬寅八月二十一日享
年六十有二曾祖諱濟祖諱遺安父諱琦祖父俱以
公貴贈通議大夫工部右侍郎祖母呂氏母施氏俱
贈淑人配呂氏封淑人子二長溫次澄俱廕補國子
生女三孫男三孫女一溫等將以 年 月 日葬
公于 山之原而詣予請銘其神道予徃交于潘氏
諸公而司馬公希周又同年同僚實以書來請故銘
不得辭銘曰

奕奕潘公寔望新安譬彼喬木碩大以繁維三司馬
乘時蔚起同本殊榦爲材匪異公年十四斬然脫穎
上書公庭規切時政粵旣登第宦績四敷刑察冤獄
兵殲叛羗在蜀歲多治績尤最夷讐其威民懷其惠
國有大役起公于家董治得宜人固怨嗟棟梁鉅材
萬里雲集清廟告成 帝心有憚乃頒綸命晉位司
空寵賚駢蕃以旌厥功惟計在國不爽錙銖惟志在
民利安是圖內直外方肅肅其度秉執有確不茹不
吐大受方隆遽弗勲遺庸告後人文刻在碑

明故資政大夫都察院左都御史贈太子少保

吏部尚書謚莊靖宋公神道碑

嘉靖丙午之冬 上召南京兵部尚書宋公爲都察
院左都御史公以疾辭不允時當天下諸司述職聚
闕下臺丞實與銓部同職考察公至則力疾稽牘評
隲臧否手披心計殫日夕由是疾增劇乃丁未正月
之八日卒于京師里第 上聞震悼命有司諭祭營
葬如例而贈公太子少保吏部尚書賜謚莊靖蓋異
數云於是公次子鄉進士介慶奉柩歸豫章而葬謂
嵩於公同鄉又同弘治乙丑進士請書神道之碑憶
與公賜第後仕宦中外垂四十三載當時同輩存者

無幾而公又不可作矣烏能已於情邪謹按公諱景
字以賢世家南昌奉新曾祖惟寧祖鑑有厚德能施
其鄉考迪嘉妣涂氏公既貴累贈其祖與考皆資政
大夫南京吏部尚書妣皆夫人公少孤奮于學弱冠
爲諸生試每居首器體疑重識者占爲公輔之器弘
治辛酉舉江西鄉薦再會試擢上第授河南睢州知
州治行卓聞改河南道監察御史是時逆瑾竊柄公
慨然引疾去家居十四年足不及城市若將終焉而
物望鬱起提學田公汝籽巡撫盛公應期先後疏薦
起爲浙江按察僉事未踰年聞母病即棄官歸太夫

人卒哀痛勺水不入口者五日服除陞山西副使會
汾州介休饑民相聚爲盜殺地方官勢張甚撫按檄
公徃征之督率行伍躬冒矢石擒獲其渠魁釋降附
宥脅從民賴以安青山賊陳卿亂公又合兵討殪
之奏以潞州爲府而創立平順縣皆公之功爲多陞
山東叅政改福建尋陞四川右布政使俱未赴改山
西左使公以晉陽地瘠賦繁民多逃竄地畝虛稅責
償平民請召人佃種而坐以輕折又定九則徵派之
例以祛里胥積弊咸著爲令轉南京光祿寺卿擢都
察院右副都御史總督南京糧儲革攬納禁糧長揭

債減呈遞樣米謹通關之驗收京儲以清改左副都
御史佐理院事歷陞刑部左右侍郎拜南京工部尚
書時脩南京奉先殿及舊邸世子府又造黃船公節
費料十之七八事竣有白金文綺之賜改南京吏部
旋改南京兵部叅贊機務至即奏裁守備叅隨人役
考選武職清查快船困弊精覈養馬利害戎政肅然
公履行端嚴執守堅確人不敢干以私然貌恭氣和
於物無忤故賢者樂之而不善者亦未嘗有怨焉官
雖久自奉不異布素方 聖明倚毗召正臺端朝野
屬望而公以一疾不起哲人云亡豈非世道之大
損

哉公配張氏累封夫人子男五長垂慶蔭為國子生
次即介慶次承慶縣學生次和慶具慶女二孫男三
卜以某年月日癸公某山之原余叙而系之銘曰

宋有廣平式懋高風載其勲伐為唐宗工顯允莊靖
名德攸同金錡玉振精美明通初筮河郡繼展臺驄
稜氛蔽日林莽潛蹤既起從政一節匪躬其勤三晉
秉憲即戎開府荆邑誕著膚功乃貳邦刑乃正司空
冢卿司馬保釐舊宮維茲都臺執法在中 帝命維
何曰維清忠一陽占候公來自東公來自東四牡龐
龐而弗我留駕言長終宮保晉秩美謚聿崇瞻彼玄

堂有石斯龔樹文撰德以告無窮

明故吏部右侍郎王公神道碑

吏部侍郎王公諱道字純甫山東武城人也公之行義孚於鄉而聞譽重於當世偉矣昔在正德辛未之歲舉進士選入中秘時山東寇亂欲奉祖母避地江南上疏乞補學職詞極懇切得應天學教授居應天學二載陞南京儀部主事召改吏部驗封歷考功文選中更憂制前後在吏部十年雅操端潔大學士西樵方公上言王某學行純正識度宏遠可備宮僚勸講之職乃擢春坊左諭德公引疾固辭曰朝廷以名

器爲重不輕假人以不次之官而人臣惟義分是安當致謹於非分之獲伏望收回成命庶大臣所薦雖不得經明行修之士猶不失安分知耻之人於是得旨允以病歸公雖去而名益高士大夫日跂其復用居一載起爲南京國子祭酒未幾又以疾乞歸自是一意家居屏迹城府讀書講學種樹灌園以自適蓋不通仕籍者十有三年而當是時自公卿以至臺諫薦疏日至嘉靖丙午起爲南京太常卿未至遷南京戶部侍郎尋改禮侍召掌北雍履任三月改吏部右侍郎然僅閱月公以屬疾遂不起矣公貌厚而氣溫

學篤而志遠始也馳騁詞翰旣而嘆曰此無益也乃
遂研精於義理之學取宋儒程朱書讀之旣又取論
語一部反覆潛玩有恍于心曰聖門平實簡易之學
固如是也公雖潛心理學而見世之立門戶相標榜
者則深耻之嘗言漢以前無名道學者其人品如張
文成曹相國黃叔度管幼安皆真道學之流雖老釋
二氏亦各有所見不可厚非凡其言議不隨時苟同
故能表見輩流大自樹立不爲利害所動進退從容
累遷銓曹兩任國子執法端教表率人才期於俗變
風美入官雖以自奉如寒素是以君子察其行而考

其言推其用心而需其柄用以福生民利國家而天
不憖遺遽云以歿嗚呼夫豈斯人之不幸哉公所著
書有大學億老子億易書詩春秋等億諸史論斷大
學衍義論斷批點六子書及韓柳歐蘇文若干卷公
於書無所不讀精擇強記妙契疾書其所論著義理
深到剖決明當自陰陽律曆醫卜農桑刑名地志之
類靡不通貫曉悉焉曾祖諱復禮祖諱綸考諱琮贈
吏部郎中配李氏生公公生成化丁未享年六十有
一卒嘉靖丁未七月二十一日訃聞詔賜祭葬如例
元配李氏封宜人繼張氏子男三人長幼康舉于鄉

次幼廣幼庶女適曹珮往予承乏吏部以侍郎掌部
事時公爲驗封郎中特越常序奏改公爲文選予以
此忤用事者至是幼康以神道之文爲請曰知先人
者莫如公然則非余誰宜銘銘曰
世每遷誘襲利僭見所可赴若湍奔往往競取以爭
喧有篤君子視浮雲避遠聲利耳不聞退然雅志樂
丘樊玩心高明究典墳卓爾大雅寔不群成均銓署
楊令芬貪者可廉薄使敦翮兮謝世遺垢氛有考其
不在斯文

明故通議大夫兵部左侍郎陶公神道碑

敬皇帝在御承 列聖理化熙洽之餘恩仁深流風
教彌篤學士大夫多端恪鯁亮而一出於惇實發諸
言議施諸政事隨其所處咸有利於國家生民雖歷
險難不易其志其用不窮蓋至于今人倫風軌未嘗
不賴之也以予所知若前給事中今少司馬南川陶
公非所謂若人者耶公諱諧字世和起浙省解元登
弘治丙辰進士選入中秘已而授職諫垣公遇事敢
言首疏乞緝熙聖學以裨治道又欲以大學衍義置
禁中以備退覽至 武宗時權奸擅政事多內降公
直言駁正無所回休其疏有曰遠讒佞以一政令修

金華集 卷三十一
九
人事以弭災異戒逸遊以保治安皆指切時政而戒
逸遊一疏斥言大閹丘聚劉瑾輩蠱惑之罪是時瑾
等日伺公所爲思有以中之久無所得乃以他事杖
公落其職隨有旨責廷臣朋黨罷輔臣劉謝二公及
知名士五十有三人而公猶列名其中旣又搜織逮
公下之詔獄與尚書劉公大夏潘公蕃同謫戍肅州
公怡然就道在肅日與二公酬詠或感物興懷繾綣
忠厚托諸比况有古作者之意焉瑾誅放還家居若
千年爲嘉靖改元 今上皇帝嗣位采錄天下舊德
名人乃起公臬司由僉陟副荐陞藩岳之長始任江

右繼則皆在河南澤敷政行乃擢中丞督理南贛汀
漳等處軍務至則條數事奏行曰重守令專分守寬
農民懲貪吏凡以重本厚生防患去慝爲務兩廣總
督員缺遷公少司馬仍兼臺秩往蒞之先是群盜久
負遐阻不可悉平公隨在撫剿賞罰信必所向克捷
前後俘馘以萬計所輯寧菁峒以千計公推讓群力
不以自張雖荷恩賚金幣而人以謂未稱其功也以
母喪歸服闋起公入贊兵本公閑達機宜羽儀朝行
物望攸屬嘉靖辛丑以 廟災陳乞避位遂致仕歸
君子惜之云公誠篤毅直而遇事審慎發必當理風

節在諫垣善政在蕃服勲績在臺憲而行義在鄉黨
第履考終靡憾也已陶系出靖節之後有爲台守者
因家于台自台徙會稽之陶家堰曾祖諱仕成祖諱
壽考諱慥咸有隱德祖與考以公貴俱贈兵部左侍
郎兼左僉都御史妣章氏封太淑人配沈氏繼配楊
氏贈封皆淑人子男三長師善次師賢皆國子生次
師蓋孫男十三人大壯中順天鄉試次大原大升大
受大臨大節大成大恒大晉大猷大欽大典公以嘉
靖丙午十一月二十八日終于正寢年七十有三訃
聞詔賜祭葬如例以其年月日葬于某山之原曩余

登朝與公相後先獲質其風采言論及觀履險大節
屹然壯之蓋未嘗不歎夫豐芑之遺也今追懷耆宿
不可作矣師善請書諸神道之石予重有感焉能不
爲之辭銘曰

惟聖有言仁必以世 明運洽隆曰在弘治出議盈
庭藹藹多士顯允陶公惇良茂達蚤升峻科亟踐諫
闕帝學緝熙至道陳納豐壘夙宵慮其遺闕群豎竊
柄炎聲沸天公諍不懾直也如弦卒罹毒罟投戍遐
邊人則曷堪公不爲病流離艱羈不廢賡詠六龍時
升氛曠清廓俊乂咸登起公臬岳爰自江右乂歷河

孺榮問以流惠孚孔宣乃畀旄鉞往蒞虔臺建策發
政務先綏懷遂陟貳卿司馬之職仍建臺燾百粵是
即旣仆而亨物望所歸荐荷 皇眷還之夏闡懸車
乞身以佚以息弗究厥施論者爲惜邦失老成士懷
遺直勒辭豐碑觀示無極

明故嘉議大夫南京都察院右副都御史趙公

神道碑

公諱載字文載初舉進士名君琰 武廟御賜今名
蒲州垣曲人也曾祖諱郎登洪武初進士爲監察御
史巡按北平以風裁著稱祖諱信隱弗仕考諱彛以

公貴贈奉政大夫戶部郎中母普氏繼母衛氏贈俱
宜人公中正德丁卯鄉試辛未進士授戶部主事陞
員外郎郎中奉命督漕上疏極言漕政利病名藉藉
起陞陝西叅議撫治商洛嘗剿劇寇有白金寶鏹之
賜土魯番侵奪哈密爲邊患總督遂菴楊公知公才
薦爲甘肅兵備副使時議者欲掩魯番擊之公言外
攘必先內治宜實糧餉利器械固堡寨謹斥堠用間
謀及倣趙充國墾田故事食足兵乃可舉否則虛內
事外徒啓邊釁䟽上議遂寢公於是銳意屯種開鹽
召商實粟塞下期年而士氣大奮所戰克捷番酋牙

木蘭帖木哥等率衆降者萬餘人又酌屯田便宜十數事條上俱獲允行陞陝西叅政仍兵備甘肅遂陞都察院右僉都御史巡撫其地仍兼理屯政公稽歲所入以革宿弊人不能爲欺邊方素不知學爲擇師儒以教學官弟子諸番人貢每乞增額公奏請遵定制驗放以省供億減盜引課令本折兼輸以便商賈虜至督將士出戰凡所斬獲親覈功次以明激勸守邊數年政績大著陞南京都察院右副都御史提督操江旣去任猶陳邊務十二事曰此吾所已試者俾後人守之耳然是時言者擿他事劾公奉旨聽勘久

之事得白衆望公起復用而尋已不祿矣公生成化壬寅九月初五日卒嘉靖癸卯十月二十五日享年六十有二訃聞 詔賜諭祭命有司營葬復以邊功錄其子應豐爲國子生蓋異數云配呂氏有淑行累封恭人子男一即應豐再娶許氏皆太宰襄毅公孫女也於是少傅松臯翁屬高書諸神道之石曰趙吾姻也予重翁命不敢辭又昔在禮部得公建議諸䟽閱之蓋公器局闕大有經畧材而文學亦優贍所著有西戎議畧兵備督儲巡撫諸奏議及畫脂漫興解頤諸稿若干卷藏于家銘曰

繫古充國治兵最良墾田塞下制伏戎羗 明有中
丞夙閑將畧治職邊陲干城是託蠢彼番夷寇我疆
場衆議出師公戒先食野有耕穫廩有峙儲邊患以
寧羗酋來歸孰構煩言而成營棘人譽用多卒枉以
直公則臥家衆望復起天不憖遺一疾而止 帝曰
念哉其有武功殊章異渥以賁其終蒲山之原仡仡
新阡珉勒有詞過者式焉

鈴山堂集卷第三十七

鈴山堂集卷第三十八

神道碑

明故少保兼太子太保禮部尚書翰林院學士

贈光祿大夫謚文通費公神道碑

江右仕族之盛其在廣信若鉛山之費少保兼太子
太保尚書大學士鵞湖公以倫魁至元輔歿謚文憲
其從弟鍾石公復以宮端翰學荐陟宗伯加少保兼
太子太保終于位 天子賜以卹贈之典易名文通
後先競爽慶鍾一門嗚呼盛矣而考公之先積德深
厚所由來者遠曾祖諱榮祖諱應麒應麒生五子曰

金川堂集 卷三十一
珣及瑞並發賢科曰瑄舉進士其二隱德不仕而曰
璠者文憲之考曰璵者公之考俱贈如子之官時人
擬之燕山五桂云公諱宋字子和幼疑重如成人讀
書強記臨文屬對出人意表舉丁卯江西鄉試辛未
會試廷試咸居高等選翰林庶吉士授編修時逆濠
陰蓄異志謀復護衛文憲在位持不可公娶同郡婁
郎中性之女濠妃之妹也故有連濠屢以意屬公公
外遜色詞而實陰折之濠因切齒賂中貴出內批勒
文憲與公皆致仕乃益毒敷于公家門戶幾不保濠
敗 今上皇帝入正大統薦者誦言公等守正被禍

詔起文憲及公俱還原職公入侍講筵預修 武宗
實錄成陞春坊贊善尋陞南京尚寶卿改春坊庶子
兼侍講掌南京翰林院事陞南京通政改南京國子
祭酒文憲再召未入京北祭酒缺朝議將移公補之
公以嫌辭陞南京禮部右侍郎改南京吏部右侍郎
蓋公六轉居南旣十載餘矣於是召為兵部左侍郎
上念公舊講臣兵貳非宜適翰林員缺內閣以公
請改禮部左侍郎兼翰林學士掌院事又命公署國
子監事旣乃拜禮部尚書仍兼學士掌詹事府事甲
辰廷試充讀卷官是年秋禮部缺尚書遂命公管部

事 太廟成加太子少保丁未加太子太保賜飛魚服數奉召入西內賜直廬其他服采金幣之賜不可勝紀戊申八月加少保蓋是時公受 上殊眷即有爰立之命而是歲十有二月之十三日公忽遘疾以卒論者惜焉 上聞而問曰案得何疾猶以撰文金幣追賜其家公之在翰林也以經術勸讀色溫氣和規益婉切為同列所稱服為文章平正雅暢詞采溢發於凡應制之作無不克稱 上意識達政體居南雍嘗陳六事居宗伯以地震陳八事悉見允行與人交和厚易直推賢讓善人樂親之公生成化癸卯二

月距卒享年六十有六元配婁氏繼吳氏俱贈夫人子男五長懋學以廕授左府都事陞後府經歷調詹事府主簿次懋升懋謙同壽有壽女三適太學生詹翔鶯餘幼懋學卜以 年 月 日葬于邑 山之原而拜泣請墓碑憶在正德丁卯之歲予為編修公計偕來京以文憲之意來訪于予公時妙齡秀發德器粹溫予固深重之其後予掌南部公任翰林居相連也出入時接軫相得甚懽逮今凡四十年同時交舊鮮有存者宜懋學之有請於予也然公歷官行事之美與夫 宸眷寵錫之隆顧又不可勝書書其大

節亦足以槩公平生而傳信後世也已系之銘曰
緊費之先由蜀來遷于信之鉛兮爰家橫林世載德
音發源洪深兮倫魁上公位致顯庸碩大以崇兮逆
藩猖狂扈跋鳴張疇扼其吭兮大義獨持罔恤爾私
屢蹈于危兮迺違昌辰 皇運維新旣詘而信兮經
幄論思成均作師令聞以馳兮颺歷兩都春卿贊謨
荐加三孤兮顯顯德門萃美弟昆莫之與倫兮 皇
眷特殊期秉政樞肩不少須兮有位有年有嗣而賢
世澤之延兮佳丘孔安豐碑桓桓名以不刊

明故正議大夫資治尹兵部左侍郎兼都察院

右副都御史贈工部尚書潘公神道碑

公諱日字希周世居婺源之桃溪里稱望族從父珍
官少司馬從兄鑑大司空從子潢大司徒暨公駢武
天朝文昌正貳冠珮相映一時仕籍鮮與倫比公
賦資淵篤績學醇貫持行飭於勤愆圖事徹於機宜
初舉進士授戶部主事以能慎著名陞郎中督運真
州時流賊嘯聚運道多梗公悉心督理轉漕無滯擢
守漳郡郡故多海寇聚散出沒洪洋絕嶼莫可驅除
然非土之豪黠陰爲之主彼亦莫得肆公至庶知其
狀取豪黠數人寘之法寇以不來丁內艱服闋復守

邵武時中官鎮守及市舶橫括民錢物公裁之不得
逞閩俗訟好株蔓連牽至數歲或不解公痛為懲創
變其俗歷陞浙江按察副使江西按察使浙江左布
政使嚴繩寬布官舉其方法立而惠行陞都察院右
副都御史撫治鄖陽以平劇寇功 詔賜金幣改留
都理卿復改少宰召入為少司寇山西慶成府宗藩
相訐久持未決公奉 命往鞠得實以聞再勘永和
府事人咸稱平改少司馬復兼中丞往督兩廣軍務
時安南不庭詔用廷議起大司馬毛公伯溫率師討
之毛方在制公適道其早見公語之曰安南恃其險

阻叛服不常久矣若兵興禍結連歲月未可解資餉
不繼柰何公宜終喪辭諸朝可得緩師俟其聞命求
貢因而撫之此萬全策也語不合去至廣因得安南
不貢狀上疏言夷狄之國本無人倫莫登庸之篡黎
氏亦季犛之篡陳氏也今若緩師移檄以問其罪彼
必畏懼修貢俾無失臣禮而止不問其他此帝王治
夷以不治之法也疏入毛公遂劾公不任戎務 詔
公回佐留都部事公曰吾謀既不用祿可苟乎遂拂
衣歸然安南之事後亦如公議云公家居十餘年不
復至城府獨聞人有急周之惟恐後歲旱徒步率鄉

人禱雨爲粥糜以哺餓者久之家日落而公陶陶然
終其身不以爲憂也以嘉靖己酉八月十有二日卒
距生成化丙申享年七十有四訃聞 朝廷勅營葬
諭祭如例特贈工部尚書加等也大父貴廉父傳賢
並以公貴贈都察院右副都御史母戴氏配程氏贈
封皆淑人子男四長曰縉錦衣衛經歷次紳次絲郡
庠生次綸女三孫男一縉等將以其年月 日葬公
于郡城北飛布山之麓具狀來京師請予銘諸墓道
考公歷官所至以剪姦平慝著稱至安南之征兢兢
焉執止戈之義是非拙於用大其爲 國家計深遠

矣雖以是歸不再出公之心豈復有所不足哉余旣
爲公同年友又嘗同官留都不敢謂不知公者銘其
可辭銘曰

滎陽之潘有鴻厥緒派流新安越茲誕著中臺六曹
秩號穹廡叔姪弟兄翩翩其羽惟公茂樸篤敬自臧
握蘭畫省飛隼雄邦寇攘以遠險健爲良兩郡稱理
其聲洋洋乃陟廉訪乃登翰藩乃擢中丞建牙鄖山
旣撫流集亦定寇姦 帝有褒言金縉煥頒長理貳
銓陪都進列入佐秋卿讞議平雪閔略精裁卓其章
徹晉秉鉞旄往臨百粵南交篡奪不貢不王 皇赫

斯怒我武用張惟公建畫文告是將無破我斧無缺
我斯閩南鄖西以武成譽豈其重膺而斯異孺保大
定功安民則裕謀旣弗售投綬以歸嘯傲溪月詠歌
林扉惠由鄉洽行從世違其業不究其名不隳負郡
之山飛布之麓鬱鬱其靈曄曄其沃公乎斯藏千秋
是卜篆辭于碑過者仰矚

明故資德大夫正治上卿太子少保兵部尚書

陳公神道碑

公姓陳氏諱經字伯常其先自閩徙家青州益都故
今爲益都人公之祖諱俊以孝弟力田隱於鄉父諱

慶尚義輕財號海春翁皆以公貴累贈資政大夫戶
部尚書公舉正德庚午山東鄉試甲戌登進士第觀
吏部政乃奏記冢宰楊公論說時政數千言楊公獎
重之選補兵科給事中嘗奉命查盤薊永遼東軍儲
先是按事者每以嚴法繩下人用不堪公所至綜覈
得宜洞究奸弊而不事苛刻陞右給事中 皇上登
極首論新政其一爲端大本以隆大化勸 上法古
帝王守祖宗成憲其一請究治先朝遺奸言皆剴切
時論避之陞通政司右叅議歷左通政冊封鄭藩充
正使陞通政司使尋轉禮部左侍郎仍掌司事四方

所上章奏躬自檢閱不憚煩勞陞奏儀度秩秩上
每屬目噐之已而陞戶部尚書總督倉場兼管西苑
農事歲運邊餉仰給太倉公殫力會計釐革宿弊公
私允賴苑田產嘉穀多岐之瑞賜白金彩幣會通政
使缺廷議以公閑於其職復推公改禮部尚書仍掌
其事未幾詔改兵部尚書入柄本兵兼提督團營軍
務時值邊警條上軍國要務七事詔皆允行時公歷
二品已六載特加太子少保公感知遇殫盡智慮調
度防邊諸務至廢寢食竟以積勞致疾家卧乃具疏
力辭上允致仕特賜給驛以去比年廷臣鮮有獲

此典者實異恩也公去父之 上意猶念公不置今
年總督倉場員缺詔復以戶部尚書起公于家命下
公先期以疾卒矣嘉靖庚戌二月四日也距生成化
癸卯十二月三日享年六十有八於是其子工部都
水主事夢鶴請乞卹典 上詔所司諭祭營葬如例
初公被徵恙易簣之前日忽令家人具盥櫛正衣冠
北向舉手加額曰吾受國厚恩平居未嘗行一不義
存一不仁以負朝廷嗚呼可謂得正而斃者已公性
誠篤簡伉立朝垂三十年門鮮干謁性嗜吟咏意不
求工而泊然自適所著有待日堂集出塞集近雲樓

稿東渚小稿并奏稿若干卷藏于家配蘇氏有賢行
累封夫人子三人長即夢鶴次夢草以廕任宗人府
經歷次夢璜女三俱適仕族孫男女五人夢鶴等卜
以年月日葬公雲門山之原而詣予請文其
墓碑予與公同朝久不克辭故序而銘之銘曰

由閩而齊厥系繇居齊積德世有傳慶鍾尚書仁且
賢策名科甲聿騰騫瑣闡獻納聲隆然銀臺奏事近
上前雍容雅度儀罔愆春卿司徒位屢遷擢任司
馬握戎權云胡疾遘賜歸田帝思舊德仍惓惓天
書舟徵寵命宣曷不待兮忽殞年雲門有宅東海壘

恩光赫奕燭幽泉銘詩紀德豐碑鐫

明封資政大夫兵部尚書翁公神道碑

嘉靖己酉秋八月七日封資政大夫兵部尚書梅齋
翁公卒于家再越月計至京師兵部尚書萬達公嗣
子也袒括爲位以哭公卿大夫咸往吊予往吊則泣
拜曰萬達不孝縻于官守不獲躬視含斂罪莫可贖
惟是神道之文所以不朽我先人者惟公是祈焉予
諾之蓋尚書負文武才頃歲經營四方南定交趾北
禦強胡勲烈懋著比入柄本兵天子倚重至形諸
宸札謂干城之託不可釋公乃今遭大故以去則

所以表先德以慰其孝思者予曷可以辭哉按公狀
諱玉字文璜梅齋號也先世莆田人有秀峯隱士雄
者始徙揭陽之鮑江子孫家焉雄四傳至可鄉人稱
爲義叟者公之父也自秀峯至義叟代有陰功而義
叟尤嗜書好古顓顓守善然義叟鮮兄弟卒以寡助
阨于讎家公生而閎朗有志問學爲父辯寃詣吏十
又八年已乃家計窘甚又連值大喪不克卒業猶時
時誦說經義授里中子弟初秀峯隱士之徙鮑江也
曰此地濱海山攬有其勝他日必生碩人而公以已
發學弗克成祖志爲憾及尚書生有奇質則撫之曰

其在茲兒乎乃自誦說經義以授尚書海鄉居人漁
尚書幼時戲漁公見恚怒曰而不聞考亭沙中畫卦
事而顧以居人之業戲邪坐客有言顯貴人富田宅
者尚書侍側公正色曰丈夫際世運當轟轟有所樹
立豈以是爲哉尚書登進士第服官政公自家貽書
必勉之廉慎副憲廣西時左江有兵事公書以妄殺
爲戒故尚書征斷藤輯南大未嘗上首功安南之役
建議撫納卒不煩師平定亂國守其家訓也尚書歷
官久歸俸于公公爲置義田供祀事卹族之孤寡貧
乏者又購地建亭月旦集父老讀鄉約其中以化導

鄉人平生足跡罕至郡邑嘗以尚書巡撫陝西一就
養所過有致金爲壽者公從容謝却不爲露陝士夫
聞公來幸一見旣見公容止楚楚無不歎服者曾尚
書受命督朔方軍公乃歸鮑江公初封承德再封
中憲每念義叟不及命輒愀然不樂比封通議大夫
兵部右侍郎又進封尚書皆得贈義叟如所封乃始
大喜曰足酬吾願也尚書旣聞喪陳情乞卹典天
子從其請詔賜祭癸如例嗚呼榮矣論者曰公之居
鄉也歲歉爲有司主賑事序給惟允不足益以已貲
鄉人多所全活盜劫其鄰公纓冠往諭曰虐貧不仁
盜愧謝解去即海寇過公里亦相戒勿犯與漢史稱
陳太丘事適相類若公者豈非篤行君子哉公生成
化甲午九月距卒享年七十有六配許夫人有閨行
早卒尚書母也繼楊恭人又繼黃夫人子四長尚書
次高紕萬程萬達女五咸適名族往年尚書葬許夫
人于鐵場山之陽至是奉公合焉禮也其銘曰
行已而爲君子錫命而至上卿恩封屢馳卹典具
膺凡今之氓胡不作善於公是徵述行有文觀者其
興乎

贈通議大夫南京兵部右侍郎顧翁神道碑

鄉人平生足跡罕至郡邑嘗以尚書巡撫陝西一就
養所過有致金爲壽者公從容謝却不爲露陝士夫
聞公來幸一見旣見公容止楚楚無不歎服者曾尚
書受命督朔方軍公乃歸鮑江公初封承德再封
中憲每念義叟不及命輒愀然不樂比封通議大夫
兵部右侍郎又進封尚書皆得贈義叟如所封乃始
大喜曰足酬吾願也尚書旣聞喪陳情乞卹典天
子從其請詔賜祭葬如例嗚呼榮矣論者曰公之居
鄉也歲歉爲有司主賑事序給惟允不足益以已貲
鄉人多所全活盜劫其鄰公纓冠往諭曰虐貧不仁
盜愧謝解去即海寇過公里亦相戒勿犯與漢史稱
陳太丘事適相類若公者豈非篤行君子哉公生成
化甲午九月距卒享年七十有六配許夫人有閨行
早卒尚書母也繼楊恭人又繼黃夫人子四長尚書
次萬紀萬程萬達女五咸適名族往年尚書葬許夫
人于鐵塲山之陽至是奉公合焉禮也其銘曰
行已而爲君子錫命而至上卿恩封屢賜卹典具
膺凡今之氓胡不作善於公是徵述行有文觀者其
興乎

贈通議大夫南京兵部右侍郎顧翁神道碑

南京刑部尚書顧公應祥往年以都憲巡撫雲南聞
母夫人之喪不候代奔歸坐論罷職久之 朝廷召
起再撫雲南進南京兵部右侍郎召為刑部尚書復
改南部以前三品秩滿追贈祖及父皆為南京兵部
右侍郎於是例得樹碑墓道公乃自述狀告于嵩曰
不肖跼伏山林一十五載榮進已絕望矣其獲有今
茲者 明天子起廢之恩也先君之遺也墓石之文
敢以請嵩與公同年進士誼不可辭謹按翁諱景字
永暉世家蘇郡長洲隨伯父仕湖州娶於烏程楊氏
遂居烏程再徙長興性恬澹不嗜利顏所居之齋曰

恬靜以見志精岐黃之業志在濟人不責其報生子
而才雅有植槐之志乃躬自訓迪不遣就傳尚書領
鄉薦翁挈之北上尤督課其業戒勿接人事尚書舉
進士 孝廟上賓奉命採史事於南畿翁與俱南暇
則令習律例及為饒郡推官翁復至任恒以平恕哀
矜為訓然密處解舍三載即僚案無知者尚書被徵
以年未三十授錦衣衛經歷翁乃得封如其官既歷
陞山東按察使翁又以例晉服色與子同然翁素性
冲約廉介取予毫髮不苟室廬田產如布衣時無增
益者一監司行部至里人有以事干者懷金為壽翁

竟拒之曰吾訓子以廉乃自黷乎尚書雅重精練固
廊廟器而所以淬礪成就之者由於翁也及自滇南
罷歸翁安之曰蒙譴以親可無歉已尚書侍色養十
餘年翁壽躋耄耄步履食飲強健如少壯家庭之間
盖訢訢然樂也嘉靖己亥四月 日以疾卒享年九
十有一高祖壽一祖伯通皆隱弗任考諱昇贈如翁
官娶楊氏初封安人後贈淑人生子四長應禎次即
尚書次應時縣學生次應元國子生以 年 月
日葬于 山之原銘曰

惠施不言寓跡在賢訓子而學身自爲師子出與出
子隱與隱弗以利遷安于義命惟是善積於慶有餘
碩大其門爰及尚書如堂斯構如菑斯穫壽越九齡
福履康樂湛恩鴻龐厥在身後既晦用章時乃天道
樹之隧首昭德有文顧渚之陽令懿永聞

明大中大夫光祿寺卿致仕西愚陳公神道碑

陳氏世家餘姚以宦業稱公諱煥字子文居隣學官
曰吾西家之愚夫也因自號西愚曾祖孟雍贈吏部
文選郎中祖雷封彰德府同知父廷敬薊州判官公
爲湖廣叅政時以太廟恩得贈祖及父如其官祖
母孫氏母于氏皆贈淑人公初以禮經魁浙士旣舉

金山堂集 卷三
進士授工部都水主事董漕艘于淮丁內艱服闋補
營繕未幾疏改南京由南京刑部主事員外郎歷禮
部主客儀制郎中陞廣西右叅議雲南提學副使湖
廣右叅政江西按察使布政使入爲光祿寺卿致仕
公天性醇厚居官以仁恕爲心至義所不可不爲苟
同當在淮時 武宗南幸巨闡悍將從所過大索賂
莫敢違者公曰禍福命也何以賂爲弗賂亦不及於
禍在廣右分守柳州猺獞出沒爲患叅將沈希儀領
兵界上欲誅之公謂之曰猺不可盡雖兵之不能止
其患不如諭之義以恩信撫之遂與希儀入其境召

酋長更爲約不犯則賞之諸酋長大悅聽令擁輿
送出境竟不犯柳州滇南土習異中土公之教切切
惟安貧惟執義以廉節爲先率之自躬士由是知方
焉歲巳亥 今上駕幸承天所過有司或坐供張不
具得譴湖廣撫臣以奉迎事檄公公條其鉅細罔不
飭備復奉檄督修 顯陵公殫力程工務極壯固稱
上意而諸監視及承事者因緣乾沒皆不得肆告
成 詔進一階有金幣之賜一日渡漢江大風雨舟
幾覆衆擁公泣公乃命舟人拯溺者活數十人竟以
無虞任江西獨四年安和寬簡官民便之吉水豪某

者依山阻水恃力與有司抗乃逮至庭下察之情人也貸其死笞之卒改行爲良民所行每若是光祿典內府諸羞饌中貴率溢額以需公披籍應之中貴頗不便因構語中傷之公於是浩然有歸志會歲考察諸大臣例得自陳公稱老乞歸甚懇上乃可其奏公歸則開園于舊第之西南壘山鑿池時花木構亭其中中有八景皆以愚名自爲文記之歲時約里中故舊賓客讌飲相娛樂飲輒至醉醉更稱曰余醉愚醉也然則公誠自託於愚者耶其爲士者曰西愚公豈真愚耶嘉靖庚戌十二月三日卒享年七十有三

配胡氏封淑人子五人長陞早世次墀次陞皆舉進士墀延平知府陞翰林編修次覲國子生次墜女一人適建寧知府王正思孫男四人銖鋌鈇曾孫男三人清濂澤公之所履兩逢大狩一治顯陵他人或惴惴慮不免而公皆因之以有譽名柳夷之畫宣恩以樹威漢江之危急人而忘已吉豪之獄捐文以得情蓋仁厚成性而智足以行之閱材遠識固去倫類什伯至其胤嗣昌繁科第踵接則所以章及人之報紆用世之猷者有在矣公葬有日陞乃馳書京師以少宗伯孫君狀請余述文樹之墓道予素辱公

金山堂集 卷三
知愛陞又爲諸生肄業館下誼弗可以辭銘曰
稽山盤延東海之涘介爲姚江英賢嶷嶷有偉陳公
鍾其粹美如玉之溫若絲而理著聲省署分秩蕃宣
惠流菁峒信解戈鋌乃登學憲振鐸南滇教隆風節
士化陶埏荆爲潛邸 園陵之邑 車駕赫臨百需
孔亟公處裕如悉辦以集孝典隆成 帝恩駢及江
右之政號稱優優郡邑承訓兵民仰流入長光祿不
副其猷浩然止足得告而休惟公所秉明達敦良在
繁益鬯任重彌光宦轍所至惠愛洋洋蠻貊可行顛
沛不忘公之施用不朽者存公之福澤裕其後昆繩

歸鳥郁郁蘭蓀述此銘詩刻在墓門

明故資政大夫兵部尚書贈太子少保東厓翁

公神道碑銘

夫有強毅閎達之士出則經營四方隨試而效歸則
悠然自適於丘壑之間若無與世故者此其志有不
羣所養有不可涯淡者美至乃履蹈險艱弗克大展
其用用矣奄忽而逝曾不少待嗟夫天之生才何其
難而奪之何其易耶東厓翁公之歿也其弟國子生
萬程使來告哀而以神道之文爲請公負文武才干
城之寄維公是賴迺天不勲遺可不爲天下慟耶予

託交于公號知己文惡乎可辭公諱萬達字仁夫潮州海陽人也翁之世系予嘗銘其先尚書梅齋公墓已詳蓋自梅齋而上世有隱德公生而舉止不凡梅齋異之曰是將大吾門乎弱冠文名籍甚嘉靖乙酉舉鄉薦明年登進士授戶部主事陞員外郎郎中以才陞梧州知府梧民夷雜居號難治蒞郡四年威惠並著安南乂不貢詔出師問罪即擢公廣西按察副使經理其事督兵於南寧公密募敢死士入莫登庸地盡得其購藥淬刃置毒上流截筒陷馬及賂關吏佯傳襲廣東以撓我諸狀乃下令敢有與賊通者

殲于市能擒賊獻者賞百金龍州馮祥州土舍趙楷韋應李寰為賊腹心日伺我事竊告之公白督府曰三兇鼎立二州之間威不可宿勢不可迫應懷懦寡慮須旦夕擒斷其中堅則楷寰可次第獲也督府即以屬公三賊者果就縛論死二州以定左江斷藤峽徑蠻據險梗化非一日矣適曾弟曰公丁者譟眾扇亂公計擒之乘勢攻諸巢賊皆破遁斬獲無數撫其餘黨向順者三千人藤峽悉平四峒介思明忠州之間所隸不常府與州互爭莫能歸一公建議以其地割屬南寧特設撫民通判一員治之築城署分保甲

峒民懽躍稱更生土人黃賢相素篤驚稱兵燹衆至是亦還所侵地登庸聞內寇輯寧乃始大恐請納款如期會陞公浙江叅政督府上疏留公改仍廣西叅政是冬登庸詣關乞降 詔罷安南為都統使司宥登庸以不死授使職治其地是役也兵不血刃事以輯寧公之功居最擢四川按察使陝西布政使尋擢右副都御史巡撫陝西未幾擢兵部侍郎兼都御史總督宣大大同宗室有潛謀勾虜為患者公廉以聞明正其罪既而議築邊墻東自老營堡西距滑石澗幾二百里增墩臺深壕窖工鉅而費省邊民賴焉數

歲虜不敢睨即少鈔掠無能深入乃曹家庄之捷尤偉謀報虜寇宣府時大同帥周尚文方幸宣府之無備而已獲安惡謀者之泄也杖而繫之獄公知其情馳疏告急請即以尚文責往禦賊 朝廷從之勅尚文兼程赴敵公迺躬擐甲胄督兵為援虜不虞其猝至也大驚宵遁公又督尚文追擊出境捷聞 上嘉悅陞兵部尚書兼右副都御史尋召柄本兵在鎮以築邊獲奸奏捷錫金幣者六廕子者二公惟一子辭廕不允乃請以廕其弟萬程焉在本兵數月奔梅齋公之喪明年虜犯畿甸廷議咸請以兵革奪情起公

金山堂集 卷三十一
上特召為兵部尚書驛使數輩趣之公聞命哭辭
几筵即日就道道遠不能即至上屢問曰翁某至
未耶既至上章待罪命奪秩候用數日命以兵部右
侍郎兼都御史經畧紫荆諸關公墨練治軍事心苦
形瘁足疽忽作疏乞歸終制而疏中字訛誤上怒
斥為民先是逆鸞奉命廣州其麾下卒擾民公嘗答
之又得其索登庸之賂鸞故切齒恨公數中傷之公
去踰年鸞以逆戮公之忠誠益著上亦思大用公
會本兵尚書員缺遂起公于家無何命下而公不建
矣公謀慮精密沉毅善斷據牘書奏論議泉湧蠶發

迅不可制故能達變濟權動有成算古稱王佐才庶
近之矣襟度坦夷與門人故交談經論文疊疊不倦
夙好山水興至窮幽探勝泊然忘歸其免歸也慕武
夷鯉湖之勝携僕遠遊旬日抵清流疾作謂僕曰亟
返吾將逝矣舟次上杭而卒疾方劇仰天嘆曰已矣
乎受國厚恩無以報也問家事不答卒之二日方抵
家而殮越四日而命使臨門遠近聞者莫不咨嗟涕
洟感上之不忘公而惜公之不及見也所著有稽
愆集平交紀畧總督奏議若干卷藏于家公生弘治
戊午距卒嘉靖壬子享年五十有五配張氏先卒繼

孫氏贈封皆夫人子二長思仁早卒次思佐甫八齡
廕國子生女二許聘都御史鄒守愚之子迪參議劉
子興之子宇泰公既卒家人請乞卹典 上詔所司
諭祭營葬如例 卜以 年 月 日葬公于

山之原公所自營者銘曰

海山奧區鮑江之涘炳靈萃英生此國士材閎器碩
允武允文服勤中外以建茂勲督師于南南土底定
專闢朔方恒以謀勝廼膺 宸眷兵本是司國有柱
石士有蔡著讒忌屢嬰忠誠彌勵進不辭難退則勇
逝 帝曰念哉起公于家云胡詰人而享不遐千里

裹糧曰探名蹟一往弗還公則何適公神不死公志
未酬或在天壤與元氣游或驅風霆揮斥八極以殛
強胡以殿王室勒文樹石永昭德馨我詞弗作以告
于冥

鈴山堂集卷第三十八終

鈴山堂集卷第三十九目錄

墓誌銘

明故衍聖孔公墓誌銘

明故安平侯方公墓誌銘

明故資政大夫禮部尚書兼翰林院學士贈太

子太保謚文恪溫公墓誌銘

明故光祿大夫柱國太子太保刑部尚書張公

墓誌銘

明故資政大夫刑部尚書贈太子少保謚襄簡

高公墓誌銘

明故通議大夫兵部左侍郎贈都察院右都御
史潘公墓誌銘

明故通議大夫都察院右副都御史吳公墓誌
銘

鈴山堂集卷第三十九

墓誌銘

明故衍聖孔公墓誌銘

先聖孔子修明帝王之道以詔後世繇漢以來世主
既崇祀之又爵其裔孫一人使主祀事曰褒成奉聖
文宣代殊其稱至宋始封衍聖公然猶兼領他職或
止署爲郎其秩視上公品高位重專宅闕里以恭奉
廟祀惟我朝之制爲然其所以崇寵之者視前代爲
至弘治末衍聖公弘緒以疾告於是成庵公以世嫡
承襲其爵公諱聞韶字知德宣聖第六十二代孫也

金山堂集 卷之三
年弱冠召至闕下美風儀 孝宗皇帝面賜玉帶麒麟服人咸榮之時少傅西涯李公名重海內登公于門歸以其子一時傾動朝著有冰玉之稱焉正德改元視學召公為分奠官命坐爨倫堂聽講賜茶仍賜宴禮部賜衣帶寶鏹丁卯入賀賜御製迴文詩庚午復入賀屬疾命醫診視頒賜上尊珍饌夫人以歸寧卒于京邸詔遣官諭祭驛歸其喪賻給甚厚 皇上兩視學皆驛召公觀禮而常賜外加賜金織麒麟緋服一襲及冠帶各一以示優異公每值 萬壽聖節則奉表入賀比歲患疾艱於拜起然尤力勉以來甲

辰復來 上溫旨慰之免其朝賀踰年疾甚卒于家
丙午二月十一日也計聞詔賜祭葬如例公生成化
壬寅八月十八日享年六十有五元配李即西涯公
之女繼配衛宣城伯璋之女封皆夫人男子二人長
曰貞幹今襲封衍聖公次曰貞寧女一人許聘尚書
李公廷相子孝元孫男一孫女二公性質敦重不苟
言咲識達世故施于有政厥績為多孔氏祭田蠲租
尼山洙泗二書院各設學錄一員典教事鄒縣故有
子思子祠特授公弟聞禮為五經博士使主祀事皆
從公之請也闕里故有志殘缺公嘗請于西涯公輯

之以成鉅典劉賊之變疏請城闕里而遷曲阜縣創
義倉以歲給三氏子孫之貧者其所建立章章如是
事繼母袁夫人及生母江以孝稱居喪一準禮制而
友愛其五弟尤至弟皆先卒撫其孤如子敬禮士大
夫來謁闕里者皆款接盡懽焉將以明年 月 日
葬孔林家塋之次貞幹等以狀來屬銘銘曰

維孔有家寔肇洙泗聖有遺澤施于世世崇德象賢
纓組攸嗣爵之上公始我 明制洵美成公宗聖主
祀溫溫其恭淑慎爾止歲朝京師罔有愆禮享有牲
醪居有賜第都人來觀宣聖之裔曷不復來溘云其

逝 皇有異恩軫卹彌至焯德贊休刻銘以誌

明故安平侯方公墓誌銘

嘉靖丙午二月四日安平侯方公以疾卒訃聞 上
為悼惜遣中官及祠部郎中一員蒞其喪命工部營
葬事賜諭祭凡十有八壇既又賜謚榮靖蓋公在朝
廷為椒房之親恩禮優重宜也公諱銳字廷器世為
應天江寧人祖諱臯占籍錦衣衛因家京師考諱永
妣陳氏公體貌豐厚為人敦重質實其始浮湛里中
有相者言當大貴公曰吾得為太平閒民足矣 皇
帝嗣位九年詔禮部遴選官嬪於是今 皇后以公

長女入選初冊立為德嬪公以恩授錦衣衛鎮撫尋
陞正千戶 后既正位中官公陞都指揮使扈從
車駕南狩道拜後軍都督府左都督既封安平伯復
進封安平侯實食祿一千七百三十石追贈曾祖祖
考皆如其爵妣皆夫人公起徒步至通侯寵異冠一
時在恒情鮮不汰侈踰溢公獨持以謙撝居常自韜
戢 上嘗賜之第公取足居息不欲大為營造服用
自常賜外未嘗過求非分由是廷中推賢元配夫人
孫氏先卒繼夫人侯氏嗣子一人曰承裕今甫七歲
女適張弘縉冠帶總旗次邵瀾錦衣千戶皆孫出又

次尚幼許聘靖遠伯子王學禮側室王出公生於成
化丁未十一月十五日得年六十卜以是年三月二
十七日甲申癸公於朝陽關之車營而癸有銘以請
於予維方之先世有隱德其所由來者遠乃發祥委
祉篤生 聖詰以母天下公貴處戚畹而能執禮守
分不褻不矜尤士大夫之所難法應銘銘曰

於惟化基厥由后德內教肅成用儀四國塗山啓祚
夏業以昌太姒初生在洽之陽倬彼安平籍世餘慶
毓德軒龍坤儀啓正徹侯賜爵五等之崇錫之土田
車服是庸公則祗祗似不能言履寵以約處盛彌謙

胡不大孝奄忽云逝 后聞震恫屢使來視 皇有
詔命恩卹備至儀曹司空襄其後事嗟哉榮靖弗祿
考終刻文茲石令問無窮

明故資政大夫禮部尚書兼翰林院學士贈太

子太保謚文恪溫公墓誌銘

嘉靖癸卯七月二十五日禮部尚書兼翰林院學士
溫公卒于蜀之里第訃聞 上命有司給祭葬如例
贈太子太保謚文恪溫公諱仁和民懷字也高祖
子成仕為蜀遂寧知州因家成都華陽曾祖諱良蜀
府奉祠副祖諱彥中蜀府良醫有四子長曰琮官至

布政使季曰璽河南叅議而公叅議之子也舉進士
改翰林庶吉士授編修以忤逆瑾意出補戶部主事
瑾敗復為編修進侍讀充經筵講官丁繼母張夫人
憂服除進春坊左諭德兼侍讀 上選用公等六人
日侍講幄賜金綺束帶陞侍讀學士修 武宗實錄
充副總裁擢吏部右侍郎兼學士仍侍日講修 獻
皇帝實錄復充副總裁公念叅議公年高奏乞貶封
以已之官從之未考滿得封典蓋異數也 上將大
用公有尼之者乃以專管誥勅入東閣而公乞歸養
甚力命馳驛以還加賜白金文綺公綵侍逾二年封

侍郎公卒朝廷賜祭葬服滿後數年始就徵如前官
命史館經理御文又命攝吏部事拜工部尚書仍兼
學士改禮部尚書掌詹事府事加太子少保 車駕
南巡奉勅留守京師 駕還 皇太子遣公奉迎於
涿州 上賜白金綵幣勞焉已而特命公充監禮使
扈視 章聖皇太后梓宮南祔 顯陵勤勩備至事
畢賚錫有加當是時 上眷注甚隆而公以病疏再
上乞歸甚懇 上惻然許之賜寶鏹給驛以行命有
司俟病痊奏用恩禮甚厚近年所未有也公舉止端
重有大臣體沉深善謀數抗論國事大同之卒擁兵

阻城公謂當以慰問代藩遣官因視卒罪狀可撫則
撫之便又寧夏撫臣以慶王不執事聞請徙之高墻
因興兵案誅從反者而公言事未彰白未可即禁錮
請勅戒諭王不悛而後治之以明朝廷議親之仁既
而遣官簿問王果得赦而夏人免于兵家圖像以祀
曰活夏城者溫公也公博學強記為文辭號稱爾雅
嘗同考會試者再主考應天順天鄉試各一辛丑主
考會試其所拔錄多名士兩充廷試讀卷官公所歷
任侍從清選官至六卿然弗及大究厥施論者惜焉
生成化乙未十二月十有八日享年六十有九元配

金山堂集 卷三十一
何以繼丘氏贈封皆夫人子三人顏頤俱舉于鄉穎
廢補國學生女七壻王麒彭鶴年徐昱張守身何察
其二在室孫男一孫女三公卒時顏試禮部聞訃哀
泣以銘請于予予昔入院踵公後今四十年來同遊
之彥颺逝雲散不可復得矣予也薄陋何能為後哉
而誼弗可辭為之銘曰

倬彼岷峨雄蜀方炳靈萃秀發厥祥名材異產詎可
當挺生括人國之望為梁為柱為珪璋茂齡載筆白
玉堂手製雲錦分天章日侍帷幄陳堯湯三纂帝紀
金匱藏籟俊多收麟與鳳更摠遠畧弭兇疆銓曹司
空荐歷賜秩宗三禮升文昌翩然謝病歸故鄉文星
夜隕天西央厥施未竟眾悼傷卹恩謚典輝彛章吁
嗟百世有耿光勒銘玄室昭弗亡

明故光祿大夫柱國太子太保刑部尚書張公

墓誌銘

公諱子麟字元瑞其先代州人永樂中以間右徙實
真定遂占籍藁城曾祖玘祖得才父欽皆隱弗仕以
公貴贈封皆光祿大夫柱國太子太保刑部尚書母
劉氏生公穎敏異常年十九舉于鄉登成化甲辰進
士授南京大理評事陞寺副寺正凡居理寺十年擢

守汝寧歷山西叅政河南布政使都察院右副都御史巡撫湖廣入爲刑部侍郎晉尚書加太子太保公歷事四聖更踐中外四十餘年其在理寺剛直精慎刑讞駁正無所依避以平允稱汝寧之政訟平賦均膏濡弘洽報政則拜孝皇燕服之賜解任則遺汝民銘頌之思時以爲天下循良之首山右澤潞等郡歲饑公志切焚溺濟以便宜亟於傾廩緩於稽券所活民以數萬計厥後撫荆南值凶歲復以行諸山右之法賑之所活民又四十餘萬急邊圉謹儲備戒戎律飭官常撫居勦叛舉良刺頑罔不秩然各究其實

實爲方伯河南鎮守巨璫恣橫不法公獨執其黨屬罪之而地方以寧及爲刑部屢更諸大獄若逆藩鏞濠及逆瑾寧彬輩相繼不軌公優然決斷悉抵于法論者謂非守有定植才無卻流不能及也今上即位特加眷遇屢荷白金彩幣寶鈔羊酒玉帶蟒服之賜至於賜給人口及歸省給鈔爲路費咸爲殊典公貴時二親在堂生膺一品之封朝廷命有司具牲米存問恩榮特異公以親老乞休皆溫旨勉留最後得請歸養天語諄切促其復來而公浩然雅志優游林下者二十餘年享年八十又八以終計聞賜諭祭者九

遣官營葬可謂福履備至也巳公生天順八年八月三日卒嘉靖二十五年六月五日元配谷氏封一品夫人子男二長九鼎以廕授前府都事次九容早卒女三長早卒次適某某孫男二將以某年月日葬公于邑西先塋之次九鼎來請銘爲之銘曰
法以威克當仁則廢澤以愛周於義則躋有偉張公柔惠且毅明執邦刑窵窵無滯亦有惠綏渙其下濟顯秩穹階繇所自致 皇眷優隆錫寵蕃異才孰昇之受大之噐福孰綏之展也純備刻石幽堂告于無既

明故資政大夫刑部尚書贈太子少保高公墓誌簡

高公墓誌銘

公自刑部致政歸優游林下者十有八載嘉靖丙午三月二十二日卒距其生天順辛巳正月四日壽八十有六其子知府廷紳卜某年月日葬于祖壟盤谷之左以予素知於公迺來屬銘公姓高氏諱友璣字肅政温州樂清人也出宋太尉瓊之後南渡時高氏以宣仁戚里曰世則者官至節度使節度之孫曰新七者愛樂清盤谷之勝家焉子孫蕃衍人姓其地曰高畧入 國朝諱官者爲華亭今官生譜譜生沔娶

于陳生公生有至性母病朝夕湯藥衣不解帶以孝聞既舉進士例得歸省及奉銓檄赴選途感異夢覺而驚遂復歸而母疾危克送終盡禮人以為孝感服除授南京刑部主事歷員外郎郎中治獄詳明諸司章奏悉資詳定擢守九江治蹟為十三郡最三載陞廣西叅政管田州府事田故夷方險也土官岑猛者坐與族類構爭削秩詔以漢官撫之前官懼而逸廣西撫按疏上謂非得優幹局識達權變之人不可適公考績至京遂有是命衆謂夷性叵測為公危之公田臣子委身之日也單車入田境宣朝廷德威示以

順逆利害始猛見公猶擁兵入衛久之乃遂欵効束身聽命公立學訓士置堡五縣其衆歸被虜男女以數百計田人帖服竟不煩兵而寇寢事平活千萬人之命事聞朝廷宥猛且復其官因徙公內地顧忤權倖意仍以知府調衛輝居衛踰年陞江西左叅政轉山西按察使陝西右布政使擢右副都御史巡撫大同公洞達政體剴裁如流所至赫赫有聲然數裁抑貴倖以事降二級致仕既復起為兵備榔桂副使外艱未赴又用薦起為山東叅政轉福建布政 召為光祿寺卿陞南京刑部右侍郎轉右都御史總督漕

金山堂
運江淮故塩徒出沒爲患公請兵討誅渠惡若干人而招徠其衆革驛傳費宿弊一清事具江淮保障錄中在漕三年進南京工部尚書改南京刑部已而召入北曹居三月餘謝歸公平居色温禮恭至臨事則嶷嶷操執不渝雖屢蹶而興無所依違媿媿故資父而後大用旣用而不獲又學士大夫想聞其名累形薦牘有冥鴻千仞之思焉祖及父以公貴皆贈資政大夫南京工部尚書妣皆贈夫人公旣致仕以俸入進兩朝二尚書又朔書院買贍田教高氏子姓及四秀來學者朔望謁祠退考業講學所居僅敝廬布衣

疏食終其身蓋孝恭誠樸出於天性然也配黃氏累贈夫人先卒子男四長廷紳舉鄉薦歷官澂江知府廷實當塗縣主簿廷舉德府良醫廷愉養利州知州女二適義官方丕國子生季如山孫男十六人曾孫男十三人於是廷紳以公訃聞詔賜祭葬贈太子少保謚襄簡銘曰

高起太尉爲宋宗臣碩大以蕃德懋宣仁節使南邁開家海濱濬指發祥篤生偉人秉心淵塞植節嶙峋鉅才洪度展也經綸單車入田蠻獠率賓保障江淮歷試益振八座累遷一德貞純歸老眉壽儗古大椿

傳野騎箕魯邦泣麟公神歸天形返茲窀盤谷迤邐
滄海蒼淪峩峩高墳松桂聿新紀德弗諼斷此堅珉
明故通議大夫兵部左侍郎贈都察院右都御

史潘公墓誌銘

嘉靖丁酉朝廷以安南國久絕朝貢議發兵往問其
罪是時吉囊方窺代郡烽堠屢警兵部侍郎潘公上
言今天下之患北圍爲急南夷越在萬里自相篡奪
以爲故常遣使諭德意不服然後用兵未晚也今舍
門庭之寇罷民而事遠畧力分寇玩非計之得也奏
聞上謂安南不庭義當征討而公職佐本兵不宜

沮撓以惑人心詔奪官歸其後以兵書毛公伯溫視
師南中宣布德意而安南尋以納款一如公言公罷
逾月言官交章乞還公久之得致仕撫按薦章亦累
十數上吏部列名起公俱未報而公卧家踰十年竟
以不祿訃聞上乃詔有司給之祭葬仍贈右都御
史公之爲忠皇上固知之矣公諱珍字玉卿姓潘
氏世居婺源縣桃溪里公嘗建祠祀其先祖予爲記
其始遷仕系詳在記中祖諱思文考諱坦俱贈兵部
侍郎妣俱贈淑人公登弘治壬戌進士知諸暨縣諸
暨號難治公治有狀民父母戴之旣去爲立祠樹碑

紀其績陞大理評事歷山東按察僉事劉賊之攻山東也蓐食秣馬犯于闐里公憮然曰以先師之宮而吾有司無救于盜賊之患乎乃奏徙曲阜縣並闕里城之陞本司副使兵備遼東丁外艱改福建尋陞山東按察使咸著茂等之績而歷山東最久東人至今思之不忘陞湖廣布政使時方營顯陵供費鉅萬皆取給湖藩公議節縮糜濫并請九江潁墅二關鈔銀佐之無加楚賦詔從其議湖民若輸宗室祿米當歲會則近省郡縣民緣吏爲奸乃坐其輸於遠郡遠郡民苦之祿不時給上下俱困公爲均其道里羸縮

之著諸令甲自是公私皆稱便陞副都御史巡撫遼東遼故有邊墉袤數百里久圯不治虜得窺伺爲患前巡撫治之功久不就公議請日役卒凡若干萬人分六營防守親督巡其間五旬而訖工詔勞公金幣內艱去位起南京副都御史提督操江尋陞南京兵部右侍郎改兵部天下方以大用屬公未幾而安南議興遂以去位焉公恂恂樂易而中實狷介遇事毅然爲之不爲威惕利回所著有愚衷錄省愆錄兩峰存稿年紀諸書凡若干卷歲于家皆本諸事情非空文無實者也公生成化丁酉五月二十六日卒嘉靖

戊申七月五日享年七十有二配張氏累封淑人先
公三歲卒子男二長鏊貢士次鑿廕補國子生女一
適戴緋孫男一榮孫女二鏊等以其年月日葬公于
邑烏塘之原乃奉給事中游君震得狀走京師詣于
乞銘泣曰先人有遺命敢以為請公昔為兵侍南都
予寔為南吏書而公族子曰為吏侍日往來論議相
好知公為深頃嘗請乞用公不獲如願而今不可作
矣尚得列其行事于石俾有聞于後世亦庶以慰公
之靈銘曰

孰為仁里考亭桑梓有鬱山川英賢聿起孰為德
逢辰叩閣上書不用蹇蹇者有賢澤彌隆祀享百世
啓其聞孫爰躋膺仕侃侃蓋世奮批逆鱗師征勿亟
交夷來賓位誦道伸身退言用薦書曰騰士望攸重
天不憖遺而遽奪之命也謂何弗究厥施堂封在斯
吊者來會 帝有卹恩公其永慰

明故通議大夫都察院右副都御史吳公墓誌
銘

吳公諱瀚字受夫河南洛陽人也其先吳人國初曰
阿演翁者以從戎隸河南衛遂家于洛焉曾祖諱成
祖諱興父諱全俱以行誼聞于鄉母李氏於成化丙

午六月廿八日生公後以公貴父祖俱贈中大夫陝西行太僕寺卿母祖母俱贈淑人公少敏慧日誦數千餘言博覽群籍發爲文辭迥出流輩與弟瀛同舉鄉薦又同第進士公初授南京山西道監察御史性素介直自負慨然有埋輪之志會中官廖鵬播虐河陝事發逮詔獄群黨猶曲護之冀得未減乃抗疏列鵬罪狀竟寘重典時論快之陞江西按察僉事公所蒞湖西訟訴繁委乃省文例詳聽斷發奸擿伏人稱神明嘗平反疑獄其人感泣繪公像祠之陞湖廣布政叅議守辰沅諸郡歲旱率吏民徒步零禱雨隨至

江足郡人誦頌其事時流殍載路請于撫臺發廩賑貧議欲行勘公曰勘則遲久亡者過半矣竟發之撫臺益重公疏薦其賢陞陝西副使整飭延安兵備有妖賊聯黨爲幻出沒無常悉計擒之陞陝西行太僕寺卿復陞山西按察使公法比精練爲衆推服凡大獄訊決罔留罔無淹禁陞右布政使轉左使是歲虜酋擁衆寇太原城素無備公乃撻衆分部固守而躬督糧出犒師已而援兵四集士獲宿飽衆賴以安又議築外城以固保障晉人至今德之陞應天府尹尋陞右副都御史奉勅巡撫畿甸兼督三關值邊疆多

壘遣戍靡常乃廣積貯修械噐簡士馬嚴校閱匝月而戰守之具各備又以馬水口李家嶺爲宣天要衝乃剗壁築垣增屯置戍備戒孔嚴後虜果至浮圖峪不得入議者以二堡經畧爲有功焉無何以事忤時議詔回籍聽用於是公乃還洛屏迹山墅人罕見其面撫按薦公經濟可以匡時清忠可以勵俗宜亟起用以慰人望而公竟以疾不起矣嘉靖庚戌八月八日其卒之日也享年六十有五公簡重沉密遇事能斷雖糾焚盤錯從容暇裕不動聲色以吏能稱于時性樂易不自岸異人尤樂從之事親孝處諸弟友愛

弟泚瀛早世育其遺孤躬爲嫁娶與季弟不異爨俸羨悉付之不問出入雖通顯澹素如布衣時喜聲律晚益工集古句千餘首彙帙藏于家配王氏累封淑人生子二長三樂領省解第進士改翰林庶吉士歷官駕部郎中次三聘舉人孫男三長本善次本德次某孫女五人三樂旣聞計將歸匍匐請予誌諸墓中之石蓋昔在中秘嘗考其業於誼不得辭又其姻今大司馬鳳泉王公所述狀事覈實可徵故序次其事而系之以銘亦以慰其子之情也公癸以卒之明年月日墓在其鄉某山之原銘曰

吳氏居洛寔肇其祀再世弗顯自公始仕以學植身
施于吏治更歷諸藩盤錯屢試惟其休聲所至有稱
孰謂不顯位陟臺丞厥用未竟後迺聿興慶流奕奕
有永其承

鈴山堂集卷第二十九終

鈴山堂集卷第四十目錄

墓誌銘

封中憲大夫都察院右僉都御史楊翁墓誌銘

封翰林院編修文林郎李君墓誌銘

封翰林院檢討徵仕郎前縣令裴君墓誌銘

封承德郎戶部主事古庄張翁墓誌銘

贈鴻臚寺署丞黎天監墓誌銘

亡女素室 贈安人墓誌銘

鎮遠侯太夫人墓誌銘

封一品夫人李氏墓誌銘

封太孺人陳氏墓誌銘

封夫人楊氏墓誌銘

英國太夫人曾氏墓誌銘

成國太夫人陳氏墓誌銘

鈴山堂集卷第四十

墓誌銘

封中憲大夫都察院右僉都御史楊翁墓誌銘

楊翁諱勝字用昔刑部左侍郎行中之父也世家順

天通州曾祖諱榮甫祖諱秀考諱禮妣唐氏寔生翁

翁少學儒棄去不欲仕然行中舉進士治邑稱最擢

御史翁封御史由御史歷太僕大理少卿僉都御史

翁又封僉都御史通州去都城六十里翁年九袞精

力逾健往來城中率馳輕騎竟日返無倦容或謂有

攝生術叩之則搖首不答予聞而奇之每從行中問

起居曰吾父日再飯脫粟冬一裘夏一葛之外無長物也間又得其懿行數端歲入必先輸公曰畢此可以卒歲無憂里中有不平從翁質一言無不帖服者嘗得遺金求其主還之主分金爲謝弗受攷其處于鄉于家庭者皆君子長者事書所稱攸好德非耶嘉靖辛亥二月九日翁無疾而逝距生天順戊寅享年九十有四訃聞 詔遣官賜祭配陸氏贈恭人子男五長即行中才望著于時次行直行恭行恕行簡女一適薛棟孫七衣立玄亢彥享卞曾孫男二陸恭人先公三十年卒葬州城東祖塋至是啓窆合葬焉葬

以卒之年五月九日行中以狀來謁予銘夫世所希慕而難得者莫若壽壽之所難者莫若健樂無肯災安享令終也古稱有道之世民罔扎瘥林藪則多黃髮鮐背之老爲世休應翁生長都邑完厚貞固壽躋期頤豈非 聖化涵濡休養所致哉而其遺行可稱者又如此夫禮重高年文闡有德銘何以辭銘曰
閱齡踰九壽以康天篤其祐躬允臧 恩封諭祭來宸章潞河之渚崇哉岡玄宅厥儷宜偕藏勒銘紀德垂休光

明故封翰林院編修文林郎李君墓誌銘

金山堂集 卷四
君卒之十年其子璣官春坊中允國子司業以省母
得請歸而速予追銘君之墓蓋君初卒京師中允已
屬予銘至是申前請說不得辭焉按狀君諱萬古字
惟一豐城之湖茫里人也湖茫之李自唐及宋文屬
日蕃入 國朝以科第起家者二十餘人他仕列中
外亦駢附映發其占籍吾袁州仕爲太平府學訓導
曰萬魁者君之前母兄也君以兄業儒乃獨理家務
素志濶遠不喜逐時利又弗善節縮以故生業日窘
然不卹也卽又以遠大屬望璣歲大比璣就省試期
當報至君輒翹企坐里門俟之已而璣果舉于鄉入

對大庭制策滾滾千餘言言皆規切時事 天子手
批其文曰讜特置高第唱名儲養中秘授翰林編修
於是君來就養京邸遇 青宮恩封如璣之官拜命
闕下觀者莫不歆艷以爲榮曰李君果成其志君素
善飲飲則行巨觴酣歌爲樂嘉靖丁酉九月卧中忽
仆地尋感風痺蓋自是多在床褥越二年己亥疾加
劇遂不起閏七月初九日也曾祖諱杲祖諱琢考諱
仁母鄒氏君早失怙而能致其哀塋葬地徒步遠涉
至血趾不顧養髮母克盡其誠一果菰微物不先母
食事太平甚恭於財利厚捐而約取一日縣索逋急

兄憂無所出乃盡出私奩以輸他日析產語畧不及
前事於是族人無少長翕然稱君孝友爲難嘗日出
得遺金于道求其人而還之見人窘即分貸之貸而
負輒置不問博通書史考究前聞動稱古人思與之
齊性坦易不設機阱與人交遇事可否盡誠忠告蓋
君之道信于家庭而稱于鄉黨者如此生成化壬辰
八月二十九日壽六十有八癸以 年 月

日墓在 山之原配封孺人朱氏子男一即璣一女
適同里余橋孫男二曰庚曰度夫古誼曠遼俗競利
趨務封殖取盈孰有視豐財而棄高識遠覽如所稱

於李君者哉大江之西世有處士若徐穉蘇雲卿杜
清碧之流皆獨行卓出表冠人群生爲一世之模歿
遺百代之軌若李君者殆聞風而興者耶矧中允君
英特有文蔚著時望所以大君之世當未有涯涘則
較君所得不旣多乎迺爲之銘曰

世競趨而我後人方取而我否嗜義若飴臨利弗苟
棄以取贏其得孰厚吁嗟若人善信孝友其聞孔昭
其行靡疚其澤之延維理可究銘以識其歲期永弗
朽

明故封翰林院檢討徵仕郎前縣令裴君墓誌

銘

君諱爵字仁夫姓裴氏裴自魏晉以來世爲右族唐
貞觀志氏族以忠賢貴戚入高等史傳所載公卿臺
省勲德聞望後先相屬而皆稱曰河東裴氏宋末有
自河東徙澤州者名其地爲河東村後遷下村又自
下村遷大陽里者自君之高祖諱榮始也曾祖諱彥
祖諱廣三世同居父諱椿由大學生丞清豐性孝居
母喪廬墓三年 詔旌其門君十二隨父廬墓讀書
輒自喜綴文十五隨入京父往蒞任君獨留京從師
取友夙夜勵學不輟學成而歸未冠舉鄉闈然屢試

禮部弗第迺選令徐之豐邑邑病於水民艱食君
征節用除煩振乏爲築堤通道民得利往來無止沒
之患學宮暨諸司行館皆規措創飭民不知勞有犯
私鑄者餽吏金求脫即縛吏正其法治諸豪民之武
斷者境內肅然旁邑徭賦恒倚君以平 武宗南巡
有司憚供億數遁避巡臺以君接備徐洪古頭夾溝
一路處辦有濟諸惠政在豐人至今稱之值父憂歸
服闋起令臨漳以母憂歸起令吳橋吳橋近畿輔多
侍衛將軍及宦寺前令率爲牽撓不得展君飭已旣
肅又精吏事豪右帖服居二載政平民安常晏坐堂

上若無所事事者歷三任屢受當道獎異屬當上九
載績君顧幡然曰既老何以仕爲上疏乞休不待報
而行乃首治諸祖塋立祠堂置祭田歲時奉祀一用
朱氏禮出貲修孔聖殿社學鄉賢祠立家範鄉約鄉
人歸其厚君孝友出天性而承於家訓居二親喪寢
處苦塊至終喪未嘗入私室教諸弟以學庠士及門
者甚衆子三人宁府學生宇案皆中鄉試宇舉進士
入翰林文行著稱以太廟恩君得封翰林檢討如
宇之官先配楊氏繼郜氏贈封皆孺人君自致政歸
不復入公門鄉飲禮請亦不赴惟與里中士夫作者

壽會爲樂素鮮疾疾三日以嘉靖辛亥六月廿又六
日卒距生成化戊戌 月 日得年七十有四女四
李惟孝龐教王鶴齡李惟岳壻也孫男四本立本固
本正本一孫女四曾孫女三字寓京聞計將
歸奉柩以明年 月 日于楊孺人墓合葬而匍匐
造余泣請爲銘余故重其世系君爲賢令宇又在門
甚久不獲辭銘曰

八裴著族三眷分名德顯遜代有聞令君繼蹟揚清
芬惠施三邑政已勤飄然稅駕還榆枌有嗣卓犖才
不群瓊樹挺出干青雲 恩馳綸勅廻龍文慶鍾來

禊方阜殷德壽考終無不欣永宅安固斯其墳

封承德郎戶部主事古庄張翁墓誌銘

光祿少卿張君鎬初舉戊戌進士予適視事禮部明年予以扈從 聖駕南巡至定興縣有司爲具餐設次於少卿宅其父古庄翁出見言貌淳樸承接甚備時倉猝僅禮之而去比後少卿每見恒得問翁起居狀今年秋少卿憂去則翁以孟秋之十日捐館距成化丙戌享年八十有四少卿卜以是歲九月之吉奉翁與其妣封安人李氏合葬于邑陽村白溝之陽而匍匐以墓道之文爲請予旣識翁於少卿還往厚誼

不得辭翁姓張氏諱景芳字德馨保定定興人也其

先居陝西涇陽在宋有仕爲評事者三世同居詔旌爲義門翁考諱材母劉氏以從戎入京卒葬定興翁僑處筑筑奉其母無有顧之者堅忍含納力勤服儉刻志經營遂能因旅作家而家日底於裕歲侵出粥飼饑所全活者甚多會大疫復施之藥死不能具棺則助之葬又創修板橋拓官路以便行者建義塾教里中子弟晚年致行益高爲邑人所敬服諸爭訟者請翁得一言即解去風義聞於一時咸稱張翁長者云翁平生訓子極篤少卿奉教自擢第初任戶部郎

督餉雲中習知虜情地形與將材高下遂擢爲職方
郎凡所揆擬動中機宜由是蔚有聲稱擢今官定興
距都城僅數舍食飲之奉克以時致翁雖老康強無
恙其卒也無他疾廼所謂壽考令終者耶配李安人
享年七十有一先翁數年卒子男四曰錦蚤世次銓
次即鎬次鏊縣學生女四俱適農家孫男十二曾孫
男十三曾孫女七計翁男女外孫而下凡六十四人
昔周人以瓜瓞論民之初生言其初小而末大方翁
之生于京師徙于定興纍然孤子門祚僅若綴旒乃
今德慶流衍及於其身親見子孫之衆多而又得光

君之駿發夫豈偶然之故哉然予聞翁性慈善每
戒人毋殺牛曰用其力而食其肉吾不忍也他至鷄
豚亦不輕殺里諺有張道人之稱夫固積德行善之
有自歟銘曰

其質敦龐天錫之良其行允臧履善執方其後允昌
濬發厥祥陽村之原封之若堂銘以載德翁也弗亡
贈鴻臚寺署丞黎天監墓誌銘

黎生天監字保之臨江新喻人父監察御史諱鳳問
學優洽居臺中舉職有聲儕輩多推讓之然以讒落
其職竟齋志以歿天監以弘治甲子十一月十七日

生于京師邸第予始舉進士與御史君友善予有息女因許天監婚焉天監童時倜儻不群既長爲邑庠生學稍有成御史君歿予乃携之入京從輸粟例卒業太學連試京闈弗第天監刻意古書法搦管作字清勁有法其作行草逼真義獻會 朝廷選能書者天監試在選中每入直 禁內日給大官之饌累荷白金彩幣及衣布之賜蓋將有品秩矣無何構一疾竟以不起嘉靖壬寅七月十五日卒卒之時年三十有九耳嗚呼可哀也蓋天監以吾女偕處京邸女屢產子不育以憂傷致疾先是戊戌九月二十五日卒

天監喪其配又久無子於是亦以憂致疾嗟乎壽夭得喪命也而乃以此嬰疾自傷其生惑也予嘗謂御史君之材賢厥用弗究將貽後人以食其報而復有此不知天之道何如也天監側室陳氏生一子曰伯承今甫六歲聘叅政南昌劉起之之女或者曰幸哉其有此也而天監歿後 朝廷念其勞特贈爲登仕郎鴻臚寺署丞蓋異恩云嗟乎歿而有知其以此自慰乎哉抑更以悲耶於是予遣人以天監之喪歸將以 年 月 日同妻葬于 山之原遂執筆誌諸墓其先代世系載予所誌御史君墓茲不著著其歷

履生卒之槩而系銘焉銘曰

汝父坎慄弗售其志汝復隕年弗待于仕嗚呼柰何天實爲之兩世我銘吁其可悲

亡女素室 贈安人墓誌銘

安人姓嚴氏諱咸宜吾長女也其母一品夫人歐陽氏初乳而生嫁于素今工部員外郎應樞其夫也高州府推官封南京刑部主事修論舅也弘治己未七月初二日其生得年四十有三嘉靖辛丑十月二十三日其卒也卒之五年 廟享覃恩安人其 封號也始予與刑部居同學友善君之父拙齋翁諱璋者

德長者以應樞長孫介媒求婚先祖少傅公諾之應樞早失母彭而祖母夏乃保抱鞠之女及門事夏孺人甚謹疾侍湯藥偕寢處經年不少懈而事庶姑禮曲盡如姑故素之宗稱焉應樞爲諸生久不第會有詔令有司歲集試諸生拔其高等者貢之與進士鄉舉三途並用於是應樞被選入貢卒業太學數年選爲湖州府推官以女偕行行時女已屬疾至湖之境疾甚僦菱湖港民舍居而卒遺言曰與夫子茹苦二十餘年吾止此命也惟吾父母恩不能報舅不得終事子婦之道未盡請薄棺斂取縗麻束身以示執

服報尊之禮夫子其勿以吾為念居官平刑惠民積
陰德貽子孫吾目瞑矣口授子鏗書奉京師上父母
幸自愛無悲念我又告父乞言為我銘誌則死且不
朽應樞於是遣使以遺書來訃告吾與妻哭之慟焉
女生而明慧異常好觀書史即能記握管作字如法
女工纂組之事不學而能且其志識尤有足取者初
歸時予仕而貧無以為奩具僅數常服充簾里俗嗤
之女弗以為戚比予祿賜豐時有所分遺女安儉如
故弗矜應樞始予立數被窘抑女但勸以力學聽命
食淡攻苦以助之然甫得祿仕而女遽及大故嗚呼

豈不傷哉生一子鏗年十七學已向成以念母致疾
後二年卒一女適左方伯李公澗山長子慶餘既嫁
亦卒是益可傷焉今一子曰鈇側室王出也應樞在
湖三年能其官為當道所交薦陞南京刑部主事歲
餘改工部今奉使歸擇 年 月 日啓女之
殯葬于 山之原吾哀女不永年祿食不沾 恩
封莫待蓋人世之極可悲者矣迺從其志為誌納諸
墓使有知殆亦可以自慰也夫銘曰
清冷兮語言婉婉兮淑資孰來而生兮其去何之貴
也弗偕兮命止于斯其巖永固兮誌以此辭

金山堂集 卷四
鎮遠侯太夫人墓誌銘

太夫人姓蔡氏諱叔能尚 淳安大長公主駙馬都尉震之女太傅鎮遠侯謚榮靖顧公士隆之配今管右軍都督府事鎮遠侯寰之母也成化甲辰十月日太夫人生其始生也 憲宗皇帝 孝莊皇太后遣中使以白金綵幣為賜既長明慧端莊選所宜歸以歸顧氏其歸榮靖也 孝宗皇帝 孝貞皇太后賜金幣為奩具太夫人雖處貴戚入門而執婦道事舅姑盡敬待媼族有禮御下以仁戚里稱焉榮靖以總兵官督漕于淮暨督兵平寇于狼山扈從 武

廟于南巡已而出鎮于湖湘勲績懋著而在淮十年太夫人皆從教育諸子愛以公禁戢家眾不得妄出入以嚴公無內顧得以竭力王事皆夫人之助公既老召歸京師而慶寰嗣奉勅守備留都繼充總兵官仍督漕于淮清謹為時稱重夫人之教然也始以榮靖貴封為鎮遠侯夫人繼以寰進封為太夫人嘗朝章聖皇太后於宮中班第一進止閒雅 章聖問而嘉之命賜茶及金錢一是歲戊申六月之十九日太夫人疾卒得年六十有五其卒也賜諭祭三壇命工曹給開墻夫役寰疏請給假治喪及奉柩還葬于

揚州詔皆允之子男六長即寰次字密窠寵女二錦
衣衛都指揮使王槐都督僉事蔣華其壻也孫男四
承光承業承學承問孫女五長適錦衣衛千戶馬世
胤餘皆幼於是以前年 月 日啓榮靖之墓而合
封焉大理少卿沈君良才曰顧氏父子治淮庶靖不
擾淮人至今思之廼述太夫人事狀寰以請予銘廼
爲銘曰

仁柔明祗淑慎其身也翟弗有華肅雖來嬪也洵美
帝甥爲侯夫人也桓桓榮靖維國虎臣也兩世鎮淮
令聞以振也崇封榮窠寵祿備申也奚代之違遽返
其真也廣陵之濱以啓茲窆也合璧同巖綏慶無垠
也

封一品夫人李氏墓誌銘

夫人李氏河南洛陽縣人歸于靈寶許氏今少傅兼
太子太傅吏部尚書文淵閣大學士松臯公其夫也
先任吏部尚書今贈如松臯之官謚襄毅公諱進其
舅也初夫人之父諱祥任山東濟南府推官時襄毅
爲山東憲副與濟南雖司屬相臨而昔同試鄉闈各
負文譽以意氣相得聞李有女賢乃爲少傅公請婚
而李許焉及歸事其姑太夫人高以孝敬不見其怠

處妯娌以輯睦下逮其庶以慈不見其戾周親黨以
惠不見其靳少傅公登進士自為推官徵入臺察改
翰林編修僉事副使叅政布政以至侍郎尚書夫人
皆隨任所至戒內外以嚴節用度以約其貴也歷膺
誥封齊榮極品朝 章聖皇太后於清寧宮從 皇
后於北郊又從內苑採桑侍宴親贊蠶側賜綵段寶
繒福履顯盛而夫人持身以抑不見其有驕盈之色
也夫人始生子曰備早世次日輿廕授中府都事陞
經歷再陞辰州府知府以夫人病不能赴任奏改禮
部員外郎掌中書事仍給正四品服色女三側室王

氏出夫人撫育不異已出孫男一曰茂楨夫人之卒
也以嘉靖乙巳八月二日距所生成化甲午四月二
十九日享年七十有二少傅公謂嵩曰吾室與吾處
五十五年矣中間予父子兄弟遇遷謫南北奔走艱
辛顛困吾室同之時乏婢僕則身親所事鮮費用則
恬淡自怡未嘗有分毫外慕蓋助於吾者實多予比
蒙朝廷厚恩祿入既豐僕御頗具夫人可以自適而
染患痿痺今又棄予以逝此予之痛而何能已于懷
也於是自述狀授嵩使為之銘嗚呼觀於公之所稱
述所傷悼則夫人之賢行從可知矣癸以其年 月

日爲之銘曰

偕處其隱約兮弗以隕獲既祔其貴羸兮弗以汰矜
肆偕老而永好兮安弗祿之康懌胡淑儀之先逝兮
顧內寢之伶俜 皇特異於卹恩兮敕工曹而營塋
事式嚮用於茲福兮曰榮哀之備至嗟夫子之悲傷
兮曷慰厥思惟令德之不忘兮視此銘辭

明故封太孺人陳氏墓誌銘

太孺人姓陳氏蘄州人福建都轉運使諱某之女嫁
於馮爲兗州府推官諱某之冢婦贈監察御史諱某
之配 今大理少卿天馭之母也初兗州與運使

公同里閭雅相友善各擇配其子而孺人來歸旣歸
姻親內外莫不贊賀御史公力學自樹流輩咸出其
下乃試有司屢不售憤欲棄業太孺人舉昔賢楊雄
梁鴻坎壈不遇譬解之御史公應貢爲上舍生太孺
人從雖困處無悔尤怨感之色已而天馭舉于鄉又
舉進士授大理評事改授監察御史督南畿學政遂
擢大理丞以至少卿才望重于時父母之教然也太
孺人以嘉靖庚戌正月四日卒于家生成化壬寅五
月二日壽六十有九子男二長即大理君次太學生
天駿女一嫁爲生員張儒妻明年某月 日葬于郡

之某里某山之原大理以修撰王右所著狀請銘于
予昔大理歸省太孺人予嘗贈之詩知其能孝也銘
曰

斬有馮陳族茂世殷令德是好爰締婚姻夫人寔生
稟德惠純婉婉有儀柔靜以仁夫君業成試屢弗鬻
兩賢之言諷諭攸篤古有樂羊厥配稱淑學績中輟
斷杼爲勗漢世賢母作戒不疑聽讞稱平母聞以怡
茲惟夫人式穀似之相其夫君安義弗隳雖詘于躬
鍾其嗣續執法中臺作士南服晉貳法曹屢緩疑獄
僉曰仁哉壽母是祝相古淑哲令聞孔貽嗟咨夫人

弗愧女師用昭厥懿篆此銘辭

封夫人楊氏墓碑銘

夫人贈禮部尚書忠烈孫公之配也公巡撫江西正
德己卯值逆濠之變死之夫人含茹悲苦撫孤持危
者十有餘年已而見諸子貴顯衣緋垂金曾玄繞膝
科第聯躅享榮養者二十年年九十二而終然由前
夫人無愠詞由後夫人無喜色凡其未亡之年一如
夫君遇難之日於乎可謂不愧乎為忠臣婦者矣嘉
靖癸丑五月五日夫人卒于京邸子堪等疏聞上
特賜祭葬給驛歸柩祔于忠烈公之塋仍賜並祭公

蓋異數也於是堪等以其嫻大學士李公所為事狀屬予書諸墓上之石予產江右蓋公所成仁之地悲昔感今於文其奚可辭按狀夫人姓楊氏其先關西人八世祖諱益之仕于浙卜居餘姚族姓蕃碩為邑中稱最祖諱宜振以子貴封工部主事考諱苓配陳氏生夫人夫人幼即端靜淑慧父母謂此女有貴相必以偶佳士久之得忠烈公婿焉夫人既歸事舅贈尚書歸隱翁及姑李夫人恪盡婦道公以是得專意問學壬子魁鄉舉癸丑進士筮仕刑曹駁歷藩臬夫人皆從而公所至勵清操聲稱藉甚贊助為多正德

乙亥公擢副都御史撫江右舟至錢塘遣夫人歸公獨往夫人已喻其意歸而隱憂戚戚後果聞變夫人慟絕復甦曰吾固知江滸之別為求訣也即命諸子水陸分途赴難未幾賊擒克以櫬還宗黨議曰凡柩自外入俗所忌盍止之夫人毅然曰吾夫捐身徇國而柩不入中堂非禮也即不利吾母子甘之矣竟奉厝正寢朝夕哭踊盡禮進諸子語之曰吾不難一哭而死所以勉存喘息以爾曹未成立也言已撫棺哭諸子環跪而哭既襄事畢其詣闕謝恩受廕為錦衣千戶時嘉靖乙酉也丙戌堪中京闈武舉第一仲子

墀貢春官選入史局季子陞乙未進士及第授翰林
編修諸子迎養夫人京邸公退必相聚列侍呼諸孫
前戲以為娛夫人顧感愴猶昔每遇公忌日輒悲咽
廢食先是夫人居屆七十誕辰宗戚集而往賀夫
人戒諸子卻謝閉門慟哭衆惻然而散其八十九
也皆寓京邸朝紳又集而往賀夫人戒如前夫人年
雖高耳目聰明步履康健平生無疾病不近醫藥至
是微恙數日卒其生天順壬午 月 日初以公郎
中考績封宜人後晉今封生三子堪累官至署都督
僉事墀累陞尚寶司卿陞由春坊中允國子祭酒今

為吏部左侍郎孫男十人鎮光祿寺署丞早世鉅國
子生鎡舉人銜襲錦衣千戶鏊國子生鑰舉人與鎡
同科鏗進士改庶吉士鈞順天府學生鑛鑲尚幼女
二曾孫男十有一人如海如瀛如漢如津如湯如瀚
如游如源如沛如江女五玄孫男二應桂應松女一
子謂恩錫隆而未艾 皇上之報公者已為備至嗣
續蕃而多賢天之所以祐公者又如是其單厚也夫
人皆目睹而躬承之可以歸報公於九原無憾矣公
墓在慈谿龍山之陽蓋奉勅遣官營兆時則少師遂
菴楊公銘其墓少傅木齋謝公表其隧而公之履歷

在國有史在郡邑有志在家有傳予為序忠烈之編
已詳茲以夫人祔不重及云銘曰
國有純臣兮家則令妻敬順無違兮厥媿孔宜江許
訣別兮義不及私抗逆以殞兮臣節凜而天鑒懿德
兮福履綏之既壽且康兮卒履期頤迺篤其慶兮維
後之貽軒駟盈里兮莫盛與夷 帝念大忠兮祭典
並施玄室同歲兮安固于斯

封英國太夫人張母曾氏墓誌銘

英國太夫人今太子太保嗣英公溶之母也嘉靖甲
寅六月二十日卒英公奏狀乞假治喪事 上允之

遣禮卿諭祭於其家命有司營葬事合於先公榮和
之壙卜期有日矣英公介都督陸公以來請銘曰予
先世數傳皆尊官大人銘予獨得後吾母哉意甚懇
至不可辭按狀太夫人曾氏世家都城父諱某母某
氏生而慧淑異常榮和公元配游無出聞夫人賢遂
禮聘焉既歸授以家政闡內外雍肅無間言而潔虔
伏臘中饋井井榮和公治戎政服勤在位無內顧憂
公疾夫人侍不離側歿則撫幼孤襄事終其身不服
純采者二十餘稔英之先始封為河間忠武王諱玉
繼定興忠烈王諱輔繼寧陽恭靖王諱懋繼榮和公

諱崙溶既襲英爵請母封於是進封太夫人太夫人
被九命珠翟冠服迺嘆曰為婦人者一旦有此敕溶
務敦詩書盡職業報國無忝爾祖以故英公嶷嶷有
立迺以恭勤祗慎受 上知眷凡戎祀大典奉命攝
其事克稱 上旨恩賚甚渥足以徵太夫人之教矣
太夫人性樂儉素遺言治喪無過侈卒之日距生弘
治庚戌九月十五日享年六十有五子男一即英公
娶夏氏太保慶陽伯諱臣之長女女一適都督同知
袁公長子錦衣鎮撫良樾孫男五長元功次元德元
增元福元祿孫女三塋以是年 月 日塋在京

西鄉連三岡祖塋之次銘曰

英氏啓封自三王勲在 帝室銘旂常代積忠孝祚
允昌珥貂橫玉先朝行夫人慈儉行有常視古賢母
惟敬姜爰以子貴受 封章躬被命服何煒煌性嗜
樸素戒厚藏嗟哉懿德士所臧祖域有兆京西鄉
勅恩賜塋輝山岡嗣公純孝盡以傷乞銘史氏昭遺
芳勒之玄石垂無疆

成國太夫人陳氏墓誌銘

太夫人陳氏贈太傅成國榮康朱公之配今太傅兼
太子太師成國公希忠管錦衣衛事都督同知希孝

之母也太傅以元勳入侍內直有年每趨蹌廷陛色和而禮恭天顏為霽今年春太夫人寢疾太傅憂形於色上覺其異常問輔臣高所以高具實對

上迺時諭太傅歸省然竟至凶訃屬時方大慶百司止常封不敢以聞上知之諭輔臣曰希忠之私令所司如例舉諸卹典而後以聞上所以加禮勲賢體其私而念之君臣一體之誼至矣既又特賜祭七壇齋糧布各五十石足又給軍夫護送其喪天寵隆異當代鮮儷焉於是太傅兄弟卜以九月十七日奉柩合窆于榮康之墓而屬嵩為之銘太夫人先

世邳州睢寧人曾祖諱政以靖難功封睢寧伯歿謚榮靖賜第家于金陵父諱鉞母伍氏榮康初配白徐楊俱早世太夫人入繼其室能以順為婦治家以謹以嚴榮康曰吾不以家為卹得盡力於官者夫人之有相也榮康薨嗣公兄弟方亂太夫人茹哀襄大事悉準於禮而勵其子以學親督其課既嗣爵諄諄訓誡俾竭忠報國尤敦愛親故賑卹孤貧曰兒享厚祿時時荷上賜予惠隱弗施可乎盖太夫人之性行可稱者如此而嗣公兄弟篤孝友內外無間言雖處貴盛謹默謙抑有漢石氏之風其得於母之教者不

誣也太夫人卒嘉靖甲寅七月十三日距生成化甲寅月日享年六十有一榮康有子三人其季曰希祖側室出太夫人視之如一孫男一曰時泰聘太保左都督陸公炳之女孫女一歸予次孫錦衣千戶鵠予與太傅偕內直寅誼為篤姻好有加於太夫人之葬而銘也其何讓銘曰

粵惟睢寧伯爵肇封成國世嗣為今上公偉歟夫人貴胄焉出作配君子榮康之室婉婉令德柔色淑聲寵祿光大弗侈弗盈有美嗣公忠也而謹簡在帝心入直禁近以攝祀享以詰兵戎恪勤祇命夙夜在公亦有難弟宿衛督府聯王朝行無盛與伍帝嘉汝子錫命之華誥書兩及玉首金葩夫人寢疾命子歸侍比其終也軫恤彌至禮臣承詔特邁前文渥典隆頒先事後聞佳城崇崇澤山之北從先榮康永裕爾後

鈴山堂集卷第四十終



